

Ebbaluḡa ya Yakobbo Enyanjula

Ebbaluḡa yino, *Yakobbo* nj'owayinandiha. Abahugu mu by'Ebbayibbuli bateberesa baati Yakobbo oyo gaali muganda wa Yesu. Era gaaliho mutangirisi w'ehibbubbu hy'abafugiirira Kurisito mu Yerusaalemu. Yakobbo omwene oyo gaali mulala hu hahiiho mu Yerusaalemu (Bik 15:13). Pawulo galoma ati Yakobbo gaali "hy'esiirō" mu bibbubbu by'abafugiirira Kurisito (Bag 2:9). Abahugu baloma baati ebbaluḡa yino bayinandiha mu mwaha ogw'ataanu oluvanyuma lw'ohusaaliwa hwa Kurisito. Hiboneha oti Yakobbo gaḡandiiha ebbaluḡa yino, n'ali mu Yerusaalemu.

Yakobbo gaḡandiihira "abaatu ba Hatonda abasimuha mu biha ehumi nabibiri abasalanihira mu mawanga" (1:1). Wayire ebi Yakobbo gaḡandiihaho biḡamba hu bafugiirira Kurisito bosibosi aye ohuloma hu "biha ehumi nabibiri," hiraga hiiti abo aba gaḡandiihira baali Bayudaaya. Ebbaluḡa yino yaali ya bibbubbu by'abafugiirira Kurisito bingi era yiroma hu biitu bingi. Yakobbo aloma ati ohufugiirira ohutuufu, hubonehera mu bikolwa by'omuutu (2:17). Era alabula abaatu hu biḡamba hu hwehubbira ḡagati w'abanjinda n'abagadi (2:1-4). Ng'ahena alabula abaatu ohwegenderesanga ebi baloma (3:1-12).

Ebiri mu bbaluṅa yino mu buupi

1. Yakobbo aheesa abafugiirira Kurisito (1:1)
2. Abafugiirira Kurisito bali n’ohugumira ebigosi (1:2-27)
3. Ohufugiirira huli n’ohubonehera mu bikolwa (2:1-26)
4. Ebibono biri n’amaani (3:1-12)
5. Amagesi ga Hatonda ganjabulo hu g’abaatu (3:13-4:10)
6. Ohwehudumbasa (4:11-5:6)
7. Ohulaabbira (5:7-20)

¹ Kojeeyo, aboluganda. Ndiise Yakobbo omuṅeeresa wa Hatonda era owa Musengwa Yesu Kurisito. Mbanandiira enywe abaatu abasimuha mu biha ehumi nabibiri eby’abaatu ba Hatonda abasalanihira mu hyalo hyosihyosi, bafuuha babuli ṅano ni ṅala.

Amagesi n’obunywani mu hufugiirira

² Aboluganda, hiisi olu ebiṅeerinṅeri n’ohuhemewa ohwa hiisi ngeri binabagwirenga, muhibalenga ng’ehiitu ehireeta amasaṅalyo,

³ ni mumanyire muuti ohuhemewa hy’ohwo hubatengesya ne hwabongera obugumu.

⁴ Era mweyongere ohuba abagumu ohwolera erala olu mulifuuha abaatu abolereeye abanuma ehiṅanga ohubahubiraṅo.

⁵ Hanye ṅaliṅo mu nywe anuma amagesi n’ohutegeera engeri ey’ohuba omugumu mu hufugiirira, alombe Hatonda agabira abaatu bosibosi n’atabalilira amuṅe amagesi ago.

⁶ Aye n’aba n’amusunga, alombe n’anumamo ehi gemoota mu mwoyo gugwe. Olwohuba

omuutu abaamo ah'ohwemoota, aba hy'ehiyungi hu maaji ehi embeño ehubba yaanjira eno ni neera. Yeesi awaakawaaka mu mwoyo gugwe ndagumira hu hiitu hirala.

⁷ Omuutu hy'oyo atanjeeganga ati anjanga ohusuna ehi asungire ohunwa eyiri Musengwa,

⁸ olwohuba omuutu ow'emyoyo ebiri, saagumira hu hiitu hirala.

Obugadi n'obujinda

⁹ Afugiirira Kurisito oyu bahye babisyamo emoni olwohuba mugadi, gesiimenga mu mwoyo olw'ehyo. Olwohuba wayire abahye bamutala aye ali n'enono mu moni ja Hatonda era anahamudunde gamuta anjani.

¹⁰ Olwo n'omuujinda yeesi geesiime olwohuba ti niye Hatonda alimwisa edaala? Omujinda niye ali hy'ehimuli ehinjotoha hyakukumuha esaawa yosiyosi.

¹¹ Olwohuba eryuba ni lijanga obubalire woohya ehirime, ehimuli ehibaho nga hinjotoha higwa n'obujoono waahyo nga bugota. Mu ngeri nj'enyene abanjinda boosi baatyopo batina. Ohufa huboolaho ni batahyetegeheeye, ni befumbire hu gw'ohwendula bujinda owohu hyalo huno.

Ebigezo n'ohuhemewa

¹² Omuutu agumiikiriza ohwola olu alibita mu huhemewa gesiimire, olwohuba n'alihena ohugumikiriza, alisuna ehirabo ehy'obulamu obutanwanjo, obu Hatonda gasuubisa abamwenda.

13 Omuutu n'agwiranga ebiñeerineri, atalomanga ati Hatonda nj'amunjindihiiye ebiñeerineri olw'ohwenda ohumuhema. Olwohuba Hatonda saananga huhema omuutu yesiyesi era ñabula ananga ohumudulinga oba gamuhema gaahola ehibi.

14 Ohutusaho ti hiisi muutu hu wuwe omwene n'ohwegomba huhwe nj'ohumuhema hwahena hwamusindigirisa, gaahola ebitoola.

15 Amayiru n'ohwegomba ebi muutu aba ni nabyo bitiina ni bisaala ni byala nga biñwamo ehibi era ehibi ehyo ni hiñangala, nga himuleetera ohufa.

16 Olw'ehyo balebe bange abahoda, batabadulinganga.

17 Hiisi hirabo ehirani era ehibulaho mbalo, hiñwa mwigulu. Hiiha ni hiñwa ewa Hatonda omwene hutonda ebi hubona ni byaduhira mwigulu, oyo atacuuhacuuha hy'ehisisigo.

18 Omwene gasalajo hu lulwe, atusaale mu bulamu obunyaaha n'abita mu buhwenda ow'ehibono hihye ehituufu, ko hibe ti hunjira ehifo ehidaayi mu bitonde bibye.

Ohunulira n'ohuhola ebi Hibono hiroma

19 Olw'ehyo balebe bange abahoda, hiisi muutu abenga mwangu ohunulira aye atabugutananga huloma era atangunjirisanga husungujala.

20 Olwohuba omuutu anaba n'asungunjaaye, saananga huhola ebi Hatonda genda.

21 Olw'ehyo, muleheño esambo josijosi ej'ohwehenamo, n'omwoyo ogw'egomba

ohuhola ebibi ogubitiriiye mu baatu hatyane. Muganye mufugiirire ehibono hya Hatonda ehi baababuulira olwohuba hiri n'amaani ag'ohunoŋola obulamu wenywe.

²² Ehibono ehyo mutahomanga hu huhuŋuliirisa buŋuliirise mwagama aŋo olwohuba aŋo muba mwedulinga wedulinge. Aye muholenga ebi hibono hibaloma ohuhola.

²³ Olwohuba omuutu anahoma hu huŋulira buŋulire, aba ali hy'omuutu agebona mu ndabirwamu.

²⁴ Omuutu oyo aheja mu ndabirwamu gebona olu afaana aye aŋo ni naaŋo n'anwaŋo nga gebirira ng'olu afaana.

²⁵ Aye omuutu owetegeeresa amagambi ga Hatonda agatufuula ohuba ab'edembe, ndaahoma hu huŋulira buŋulire gebirira ebi aŋuliye aye gegumya ohuhola ebi gamuloma, Hatonda anamuŋenga ekabi mubi ahola.

²⁶ Hiisi muutu oweranga ohuba omunadiini, cooka n'ataŋanga huŋuga lulimi lulwe, oyo aba gedulinga hwedulinga, obunadiini buwe buba ŋabula ehi bumugasa.

²⁷ Obunadiini obutuufu era obuŋumaho hamogo mu moni ja Hatonda Seefe, nj'ohuba n'omwoyo ogw'ohubbiita abafuubbi n'ohuyeeda abanamwandu mu bugadi waawe, n'ohwehumanga ndigeyonoona n'ebibi ebi abaatu abandi bahola.

2

Ohutaba baluboole

¹ Aboluganda, enywe ng'abafugiirira owenjono Musengwa weefe Yesu Kurisito, mutabanga n'oluboole.

² Niipa ng'ehyohuboneraho, singa mubaaye mu luhumbaano lwenywe njaabaŋo omuutu owuujja gengira aŋa muhumbaniiye ni gambaaye engoye ej'ebbeeyi, n'epeta ey'ezaabbu, nga n'omugadi awambaaye atyo atyo yeesi gaaja gengira,

³ munasangaalira owambaaye engoye ej'ebbeeyi mwamuŋa aŋa ohwihala aŋalaŋi, mwamuloma muuti, "Muhulu, ewe yiihala ŋano." Aye mwaloma omugadi muuti, "Ewe hola ni wemereraho aŋo," oba muuti, "Yiihala ŋaasi aŋo."

⁴ Munahola muutyoo muba simuleetire oluboole ŋagati wenywe era ni muloma muuti abaatu abandi bamugaso ohuhiraho abahyawe?

⁵ Aboluganda ale ni mwetege mbalomere. Abaatu aba mutala olwohuba bagadi, Hatonda niye mbabagatobola ohuba baŋinda mu humufugiirira era gaabaŋa omugabo mu wahabaha wuwe ogu gasuubisa abamwenda.

⁶ Aye enywe abanyooma abagadi, leha nindi mbabuuse. Abaŋinda sinje ababayikiriza hu byenywe? Abeene abo sinje abaŋuuna ohubadyedyesa ni babahubba mu mbuga?

⁷ Era abeene abo sinje abaduula oyo oyu mwafugiirira nga Musengwa yenywe olu mwafugiirira?

⁸ Ale hanye mwoheresa egambi eri Kurisito gaatuŋa ng'olu liroma mu byaŋandiihiwa eri

galoma ati, “Yendanga omuutu wahyo ng’olu weyenda wamwene,” muba muhola bulanji.

⁹ Aye munaba baluboole, muba muhola hibi era muba mufuuhire babbwagi b’amagambi era ni guhenire ohubahira.

¹⁰ Olwohuba hiisi muutu anamba amagambi gosigosi cooka goola anjatu gabbwagaho erala, aba n’omusango ogunjeranjerana n’ogwohubbwaga amagambi gosigosi.

¹¹ Hiri hiityo olwohuba owaloma ati, “Soholanga buhwedi,” omwene oyo nj’owahena gaaloma ati, “Siwitanga muutu wahyo.” Kale onjagire ohuba ti sohola buhwedi aye wiita abaatu bahyo, anjo oba oli mubbwagi w’amagambi.

¹² Olw’ehyo mulomenga era muholenga ebi muhola ni mumanyire muuti Hatonda alibasalira omusango ni geema hu magambi gage agatufuula ab’edembe.

¹³ Olwohuba hiisi muutu abula husaasira eri owahye ni Hatonda yeesi alimusalira omusango n’abula husaasira aye aliba n’ohusaasira eyiri oyo asaasira abahye.

Ohufugiirira ko n’ebikolwa ebiraga ohufugiirira ohwo

¹⁴ Aboluganda, singa omuutu aloma ati afugiirira Kurisito aye n’atahola bikolwa ebiraga ohufugiirira huhwe, ehyo hiri n’ehi hinjanga ohumuyeeda? Dala ohufugiirira hy’ohwo hunjanga ohumunonjola?

15 Ha hulome singa ṅabaṅo oboluganda omusinde oba omuhasi aṅuma ehi gedanya hu mubiri n’ehi anabisye enamunwa,

16 mulala hu nywe gamuloma ati, “Owoluganda, tiina werabirire; onahasune ehyohulya n’ehyohuwiiha amagumba” cooka ndabaho n’ehi amuṅaaye, ehyo hiba n’ehi hiyeeda omuutu oyo ali obubi?

17 Kale n’ohufugiirira hwosi huutyo. Singa huba hwoṅene ni huṅumaho bikolwa ebi-huṅereheraho, huba huṅuma mahulu.

18 Aye hamunga ola aṅanga ohuloma ati, “Ewe yebeere aṅo n’ohufugiirira huhwo, ese naabe n’ebikolwa.” Ese keesi ndoma ti ale ndage omuutu aṅanga ohufugiirira Kurisito aye n’aṅuma bikolwa.

19 Hituufu hyene ti ofugiirira oti Hatonda ali mulala. Ehyo hiraṅi. Aye hebulira oti n’emisambwa joosi jiityo pojifugiirira era ehyo hijireetera ohukaakana olw’obuti.

20 Musirusiru ewe, wahendire kuṅe ehiraga ti ohufugiirira ohuhayaga ohuṅumaho bikolwa ebiraga, huṅuma mahulu?*

21 Hiina ehi Hatonda gemaho ko asiime sehulu yeefe Yibbulayimu? Sigeema hu hokolwa hihye ehy’ohuṅwa hu mwana wuwe Yisaka abe eṅongo eri Hatonda?*

22 Oweene otye? Ohufugiirira huhwe n’ebikolwa bibye byatiinira ṅalala era ebikolwa bibye nj’ebyejulirisa ohufugiirira huhwe.

* 2:20 2:20 Oba huba hufu. * 2:21 2:21 Tand 22:9-10

23 Ng'ehyanandiihiwa hyolerera ehiroma hi-iti, "Hatonda gabala Yibbulayimu ohuba mugwalaafu olw'ohufugiirira ebi gamuloma era olw'ohufugiirira huhwe, gafuuha meeriwe."*

24 Peega ti muweene muuti ebikolwa ebi muutu ahola nj'ebimuleetera ohumubala ohuba omugwalaafu sosi hufugiirira hyonene.

25 Mu ngeri nj'enyene pohyali ni Rahabbu omuhasi owaali omuhwedi. Hatonda gamubala ohuba omugwalaafu olw'ehikolwa hihye eh'yohusangaalira n'ohuhweha mu nyumba yiye abaatu abaali ni batiinire ohuheetera Abayisirayiri. Abaatu bano gahena gabayeeda ohweyiba n'ohuduluma ni babitira mu ngira eyindi.

26 Mu butuufu ng'olu muhimanyire muuti omubiri gunanumamo mwoyo guba mufu, n'ohufugiirira hwosi huutyo. Ni hutabaho ebikolwa, huba hufu.

3

Ohwehuuma mu malomere

¹ Aboluganda, mutagesyaho mwesimwesi ohufuuha abasomesa b'ehibono hya Hatonda, olwohuba ng'olu mumanyire, efe abasomesa abahyefe, Hatonda n'aliba n'atulamula, saalituleheramo kadi nanatotonono.

² Abaatu hwesihwesi anabula hwabulira, hubbenga mu hino oba hira. Cooka nanabaño omuutu atabbenga mu malomere era n'ananga

* 2:23 2:23 Tand 15:6

ohufuga omubiri gugwe gwosigwosi, oyo aba anjangaaye mu hufugiirira huhwe.

³ Singa omuutu abaaye gendire esolo eyi balanga baati embalaasi emugondere n'ecuuhira hiisi eyi aba ni gendire, ayita ehyoma mu munwa ohumuyeeda ohuhola ehyo.

⁴ Leha nindi hujeege hu meeri ng'ehyohuboneraho ehindi. Wayire emeeri guutu gubbala era embeño ey'amaani nj'enjanga ohugugeesya, omuutu ayigimba atambisa ahaatu hatotono heene enyuma waayo ohuyicuusa ohutiina hiisi eyi aba ni genda yitiine.

⁵ Mu ngeri nj'enyene, n'olulimi lw'omuutu lwosi luutyo. Wayire olulimi hamesu hadyagala hu mubiri gw'omuutu, omuutu alutambisa ohwepaaha mu biitu ebyene ebingi. Neega hu deño hasiigu eryahula lyasidiha ng'olu ahaliro ahatotono halinjamba lyanya lyaguhuliha.

⁶ Kale n'olulimi lwosi luli hy'omuliro. Lwiju-uye obubi ow'ehyalo hyosihyosi era nj'ehimesu obumesu ehy'omubiri gw'omuutu aye lusaala ehibi ehimaamira obulamu w'omuutu wosiwosi. Ebibono ebi lulimi luloma bisaala obuyoga mu baatu obuli hy'omuliro ogwehereba ni gutasima ogusihirisa hiisi hiitu anja gubita.

⁷ Olwohuba ohwemera erala hu hutonda hw'ehyalo, omuutu ali n'obunjangi ohunuga ebiha byosibyosi eby'esolo n'enyuni, n'ebyenjalula, n'ebiramu ebyomu maaji.

⁸ Aye nanjuma muutu hu wuwe anjanga ohunuga olulimi. Olulimi nj'ehiitu ehigosi, ehitafuliha ehinjanga ohuleeta amafa mu abaatu hy'obusagwa w'etemu.

⁹ Olulimi olwene olu muutu atambisa ohujumirya Musengwa era Seefe, nindi olwene olwo nj'olu atambisa mu hunwaba abaatu aba Hatonda gawumba mu hifaananyi hiye.

¹⁰ Mu munwa nj'omwene, pomunwa ebibono ebijumirya n'ehinwaba. Aboluganda, ehyo si-hisaana huba hiityo.

¹¹ Esulo y'amaaji endala sesobola hunwamo amaaji amalanyi n'amaaji agalimo ehinomeresi ehya cumbi.

¹² Aboluganda, dala omusaala omutiini gunanga ohwamaho ebibala eby'omusaala omuzayiti, oba omuzabbibbu gwamaho ebibala eby'omusaala omutiini? Mu ngeri nj'enyene, esulo ereeta amaaji ag'ehinomeresi hya cumbi seenanga hunwamo maaji agabulamo hinomeresi ehyo.

Amagesi aganjwa eyiri Hatonda

¹³ Nalijo mu nywe omuutu ali n'amagesi ag'ohwabula ehiranyi n'ehibi? Omuutu oyo alage amagesi ago mu sambo endanyi eyi gebisyamo, nomu bikolwa ebi aholo mu hwenomeha ohunjwa mu magesi ago, aga ali ni nago.

¹⁴ Aye munaba n'emyoyo ej'ekirihindi n'ohutenda yabahyenywe ohusaala esodi, mutepaaha muuti muli bagesi olwohuba munahihola, muba mwedulinga.

¹⁵ Amagesi ag'engeri eyo siganjwa yiri Hatonda, wabula gaba g'abaatu abaneega hu by'ehyalo. Omwoyo wa Hatonda sinje agaba amagesi hy'ago wabula ganjwa yiri Sitaani.

16 Olwohuba hiisi aḡaba omwoyo ogw'ekirihindi n'ohutenda yawahyo husaala esodi, ḡabaḡo nionionio n'ebibi ebya hiisi ngeri.

17 Aye abaatu ababa n'amagesi aḡaḡwa eyiri Hatonda, ehidaayi nadaayi baba n'emyoyo migwalaafu. Ehindi baba baatu abenda emiyaaya ohubaḡo, abehaliiriha era abali n'ohwenda eri abahyawe. Olw'ohwenda ohu baba ni nahwo eri abahyawe, babaholera eby'ehisa ni batehubbira era ni bali b'amazima mu bibahola.

18 Bahola ehyo olwohuba baholerera emiyaaya jibeḡo era n'ebibono ebi balomera abaatu biḡwamo ebikolwa ebi Hatonda genda.

4

Ohuhola omuhumba n'ehyalo

1 Hiina ehireeta obuyoga n'ohuniriḡana ḡagati wenywe? Ehyo sihiḡwa hu mwoyo ogw'omuhopo ogu muli ni nagwo?

2 Mululuhanira bugali ebiitu ebi muḡuma aye ndimubyolaho. Ehiḡwamo nga mwita abahyenywe. Oguhopo gubaḡira n'ohubi mutanḡanga husuna, ehiḡwamo buyoga n'ohuniriḡana. Era simusuna ebi mwenda olwohuba simusaba Hatonda hubibaḡa.

3 Ate n'olu musaba Hatonda abanḡe ehi mwenda, saahibaḡa olwohuba musaba ni mu-genderera hweruuha ni mubihenera mu hwe-sangaasa mwabeene.

4 Enywe abali hy'abafumbo abahwedi, si-mumanyire muuti onahola omuhago n'ehyalo

obawesaalira bulabe eyiri Hatonda? Hiisi muutu asalaŋo ohuhola omuhumba n’ehyalo, afuuha mulabe wa Hatonda.

⁵ Oba munjeega muuti ehyaŋandiihiwa ehiroma hiiti, “Hatonda abubira Omwoyo oyu gatuŋa ohuba mu bulamu weefe” hibula mahulu?

⁶ Aye Hatonda geyongera hutuŋambira hisasabirisi. Nj’ehigira ehyaŋandiihiwa ehindi ni hiroma hiiti, “Hatonda sigenda abehudumbasa aye aŋambira abo abeŋomeha ehisasabirisi.”*

⁷ Olw’ehyo mwenjeeyo eyiri Hatonda. Munjiranienga Sitaani, yeesi gaaja hubatya abadulumenga.

⁸ Mute owesige mu Hatonda, yeesi aja hubeŋa abenga ni nenywe. Mulongoose obulamu wenywe, enywe abali n’ebibi, enywe abali n’ekubbiro n’engaluliro.

⁹ Muwombonale, muhubbe enduulu, mulire n’amasiga. Mugawiiheho, enjeho jenywe jifuuhe amaliro, n’esangaalo lyenywe lifuuhe mombo olw’ebibi ebyo ebi muhola.

¹⁰ Mwenjomehenga mu moni ja Musengwa era Ye omwene aja hubadunda abate aŋalaŋi.

Mutasaliranga bahyenywe musango

¹¹ Aboluganda, mutageyananga. Hiisi muutu ageya owahye n’aloma ati ehi aholo hibi, aba atala amagambi ga Hatonda n’aloma ati mabi. Onatala amagambi ga Hatonda waloma oti mabi oba soonanga huhola ebi galagira wabula oba wepatiihaho ogw’obulamuzi.

* 4:6 4:6 Nge 3:34

¹² Omwene hutano magambi era nga nj'omusali w'emisango ali mulala, nje Hatonda. Oyo nj'ananga ohunonola era nj'ananga n'ohusihiirisa. Ne ewe weranga ndiwe ani ko osalire owahyo omusango?

Ohulabula eyiri abaatu abepaaha

¹³ Ale njaahani ni mwetege mbalomere enywe abebuuja muuti, "Olwa leero oba olwejo hunahatiine mu hibuga hirebe, huheneyo omwaha mulala ni huhola ebyamatano husune amagoba."

¹⁴ E! Enywe omutamanyire ng'olu bunahahye olwejo munanga ohuloma muutyo? Mumanyire ehi obulamu wenywe buli? Simumanyire muuti enywe muli hy'ehisuusu ehibaho ahamanga hatotono nga hinwano?

¹⁵ Mwahali muloma muuti, "Musengwa n'anahaganye wahya buhaana, hunahahole hino oba hira."

¹⁶ Aye njaahani mundoma hy'eyenywe eyo muba mwepaaha, ni muhinjira muuti ebiitu biri mu bunangi wenywe. Ohwepaaha hwosihwosi ohwengeri hy'eyo huba hubi.

¹⁷ Olw'ehyo, hiisi muutu amanyire ehiraŋi ehi gahali n'ahola aye ndaahihole, aba aholire hibi.

5

Ohulabula eyiri abanjinda

¹ Ale njaahani abanjinda ni betege, mbalomere. Bahole batagihireno ohubbologa ni berira olw'ehiseera ehigosi ehinahabooleho.

² Obuᅇinda waawe obu babungire bubabulira mahulu, buli hy'ehiitu ehibolire ehiᅇunya ehibulu. Ebyambalo byawe eby'ebbeeyi biri hy'ebi hayenje mulusi aliye.

³ Hu ludaalo olu Hatonda anahasalireho omusango, eby'obuᅇinda ebyo binahabule mahulu hy'ehyoma ehitalagire ng'olu hitaba n'omugaso eri omweneehyo. Eby'obuᅇinda ebyo ebi bahunhuta ni nabyo mbebinahabe obujulizi obulaga ng'olu baluluhanira obuᅇinda era ng'olu bali bagumu era abatenda huyeeda abahyawe abali mu bugadi. Bahumbanisiye era behuhuta n'ebyoᅇinda, ne bamanye baati ekomerero y'ehyalo yiri huupi hwola babasalire omusango.

⁴ Ale nindi ni betege mbalomere! Abatambi abahola mu ndimiro jaawe beririgana olw'ohubakupania omuhemba gwawe era ohweririgana hwawe hwolire mu matwi ga Musengwa Omwene Buᅇangi.

⁵ Banyooye obulamu w'ehyalo era besangaasa ng'olu babona baati pohyola ohuba. Basangahiise emyooyo jaawe aye bebiriye baati Hatonda anaatere ohusihiirisa abahosi b'ebibi.

⁶ Baleeteeye abaatu ababulaho musango ohubasalira omusango ohubahira era babetisa owereere oweene olwohuba sibanaᅇanga hwesoolaho.

Ohugumikiriza n'ohusaba

⁷ Ne enywe aboluganda, mube bagumikiriza ohwola olu Musengwa anahagobole ohuᅇwa mwigulu. Mubonere hu mulimi ng'olu ahuumirira ohwola olu fula endaayi ko n'erondaho

yigwa eroba lyamesa, lyahusa era lyamyamba ebirime ebi aba n'ahomire mu ndimiro yiye.

⁸ Mwesi muutyo mube bagumikiriza era abagumu, olwohuba Musengwa ali huupi hugobola.

⁹ Aboluganda, mutenjulumunyanga hu bahyenywe, olwohuba banahabasalire omusango ohubahira. Ale mubone Yesu omusali w'emisango omuhulu anaatere ohwola.

¹⁰ Aboluganda, mubonere hu banaabbi abalomanga mu siina lya Musengwa, ababonaabona aye bagumikiriza.

¹¹ Ng'olu mumanyire, besiimire abo abagumikiriza ohwola hu komerero y'obulamu waawe. Mwanjulira ebyafa hu Yobbu omuhalehale ng'olu gagumikiriza era mumanyire ehi Musengwa gamuholera oluvanyuma. Mu butuufu Musengwa ali n'ehisasabirisi.

¹² Aye balebe bange, ehihulu mu byosi, mutamalanga galayira muuti "Mu mazima aga Hatonda ali mwigulu," oba ehyalo oba mu siina ly'ehiitu hyosihyosi aye mulomenga amazima. Ni mulomanga muuti, "Pohiri," dala hibenga ni hiri c'ehyo era ehi munagaanenga muuti "Bbe" hyosi hibenga nga c'ehyo. Anabula ehyo banahabasalire omusango ohubahira.

¹³ Hanye njaliŋo mu nywe ali n'ebigosi, asunge Hatonda amuyeede. Hanye njaliŋo asangaaye, gembe enyembo n'amujumirya.

¹⁴ Hanye njaliŋo omulwaye mu nywe, alange abatangirisi b'ehibbubbu hy'abafugiirira Kurisito, bamusabire bamunjahe n'amafuta, mu siina lya Musengwa.

¹⁵ Ohusaba ohu bamulombera n’ohufugiirira, hugema Musengwa gesuusa omulwaye oyo era n’aba n’ali n’ebibi ebi gaahola, Hatonda abimusionja.

¹⁶ Olw’ehyo, hiisi muutu abbutulirenga owahye ebibi bibye era hiisi muutu asabirenga owahye ko munjone mube n’obulamu. Singa omuutu omugwalaafu asaba, esaala yiye yiba n’amaani agaleetera ebiitu ebi asungire ohubaŋo.

¹⁷ Ale mubonere hu naabbi Eliya owaali omuutu hyefe. Ni gasaba n’omwoyo mulala, efula siyatonya ohuhena emyaha edatu n’emyesi mukaaga.

¹⁸ Nindi ni gasaba efula yigwe, Hatonda gatonyesa efula ng’eroba limesa ebyohulya.

¹⁹ Aboluganda, singa mulala hu nywe aŋaba, gaŋwa hu ngira ya Hatonda etuufu, ne ŋabaŋo mulala hunywe amugobosa,

²⁰ muhimanye muuti omuutu yesiyesi aba n’ayeedire omuhosi w’ebibi oyo, ohuŋwa mu hubbenga huhwe, aba aŋonisye omwoyo gw’omuutu oyo ohufa era aleetera Hatonda ohusionja ebibi ehipyeda ebi omuutu oyo aba ni gahola.

**Endagaano Epyaha ko n'ebitabo ebindi
eby'Endagaano Ekayire mu Lunyole
Nyole: Endagaano Epyaha mu Lunyole (Bible)**

copyright © 2019 Wycliffe Bible Translators, Inc.

Language: (Nyole)

Contributor: Wycliffe Bible Translators, Inc.

This is the New Testament in Lunyole of Uganda, with 10 books from the Old Testament.

All rights reserved.

2025-05-17

PDF generated using Haiola and XeLaTeX on 17 May 2025 from source files dated 17 May 2025

e00787cd-838f-597a-9477-00b97e4e2cff